

# Falsafah dan Kebudayaan

## Masalah *Qadā'* dan *Qadr* (Takdir Tuhan)

(5)

Dalam siaran yang kelima ini – penutupnya – kami menyajikan penjelasan Faḍīlah al-Ustādh Muhammad

Abu Zuhrah, mahaguru Syariah Islam di Universiti Kaherah.

Dalam penjelasannya ini, beliau menangkis tuduhan orang-orang Barat dan murid-murid mereka yang mengatakan bahawa iktikad kepada *qadā'* dan *qadr* (takdir Tuhan) membawa kemunduran. Beliau menegaskan bahawa kepercayaan terhadap takdir itu sangat-sangat menguntungkan umat Islam, hatta yang difaham secara salah itupun ada juga faedahnya.

**(Terjemahan Abdullah Basmeh)**

Tuduhan-tuduhan seperti ini, berulang-ulang dilemparkan oleh orang-orang Barat kepada orang-orang Timur. Mereka berkata: Orang-orang Timur bila diserang penyakit tidak bersegera mengubatinya, malah hanya berpada dengan mengatakan perkara itu sudah takdir. Orang-orang Timur – kata mereka lagi – juga tidak berusaha mencari rezeki, dan tidak mengerjakan sawah dan kebun ladang mereka. Mereka hanya berpada dengan mengatakan sudah takdir.

Tetapi adakah orang-orang Barat yang menuduh itu bertujuan baik terhadap Timur? Adakah orang-orang Eropah ketika mencela iktikad berserah kepada takdir Tuhan itu, kerana mereka bertujuan baik kepada Islam dan pemeluknya atau kerana mereka dapati kepercayaan terhadap takdir Tuhan – walaupun yang telah terpaling daripada hakikatnya yang telah ditentukan oleh Islam – suatu kepercayaan

yang membangkitkan kekuatan dalam kalangan umat Islam (dan kesannya itu dapat dilihat) hingga pada kedudukan umat Islam yang tercela yang mereka berada di dalamnya hari ini?

Sebenarnya kepercayaan terhadap takdir Tuhan itu menurut rupa yang menjadi pegangan umat Islam (walaupun ketika mereka berada) dalam gelap-gelita kejahilan adalah berfaedah, kerana kepercayaan yang tersebut telah mewujudkan jiwa yang hidup dalam diri mereka.

Doktor-doktor zaman sekarang mengubati orang sakit dengan perasaan ketenteraman jiwa, dan dengan menghidupkan perasaan percaya kepada Allah dan kepada manusia. Orang Barat menyalahkan orang Islam percayakan takdir Tuhan, kerana orang Barat mendapati kepercayaan umat Islam yang sedemikian itu dapat mengawal umat Islam daripada

kebinasaan, dan kerana mereka mendapati umat Islam

sentiasa biak dan berkembang. Hal ini sudah tentu

menyebabkan orang Barat dengki dan sakit hati.

Sedang perkara yang menyebabkan umat Islam biak dan

berkembang ialah kerana iman mereka terhadap takdir

Tuhan atau “*qadā’* dan *qadr*” itu.

Seorang Muslim melahirkan zuriat: seorang,

dua, tiga dan empat, iaitu suatu kekuatan manusia

yang zahir ke ‘*ālam al-wujūd*. Si bapa itu, menerima hal

yang demikian (kelahiran anak banyak) dengan segala senang

hati kerana dia percaya kepada takdir Tuhan,

meskipun ia dalam keadaan susah dan menderita.

Orang-orang Barat menyalahkan orang-orang Islam percaya kepada

takdir Tuhan ialah kerana sesuatu tujuan yang tertentu

dan tujuan itu ialah kebinasaan umat Islam. (Mereka

suka kalau umat Islam pupus dan hilang lenyap dari

‘*ālam al-wujūd* – P.). Oleh itu saya tidak

memandang bahawa iman kepada takdir Tuhan yang diamalkan

secara salah itu menjadi sebab kemunduran, tetapi

yang sebenarnya inilah natijah kemunduran. Dalam pada itu



*Abu Samah bin Haji Muhammad Nor, murid sekolah Agama Seri Setia Pematang Duku, Benut, johan dalam*

*Peraduan Bacaan Qur'an seluruh sekolah-sekolah agama pasukan Pontian Barat, bergambar dengan guru-gurunya dan*

*hadiyah-hadiyah yang telah dimenangginya. Pengenalan: nombor 4 dari kanan ialah Tuan Haji Ayub bin Haji Nawawi Penghulu*

*Mukim Benut, dan nombor 3 dari kiri Cikgu Mat Raden Guru Besar sekolah tersebut.*

saya memandang dia juga yang menyebabkan kita berkekalan wujud (tidak hilang dan pupus sebagaimana yang dikehendaki oleh musuh-musuh Islam). Tidak syak lagi adalah menjadi wajib bagi kita membetulkan perkara yang salah itu, dan menjelaskan bahawa kepercayaan kepada takdir Tuhan itu adalah menuntut kita supaya berusaha dan bekerja seperti umat Islam yang terkenal banyak

berusaha dan bekerja. Kita juga tertuntut menarik perhatian umat Islam, bahawa Saiyidina ‘Umar ibn al-Khaṭṭāb

(dalam masa menjadi khalifah) tatkala berangkat ke negeri Syam dan mendapati penyakit taun sedang merebak di negeri itu, ia pun berkira hendak berpatah balik ke Madinah, tiba-tiba orang bertanya: “Adakah Amīr al-Mu’minīn hendak mlarikan diri daripada takdir Tuhan?” Saiyidina ‘Umar menjawab: “Kita lari dari takdir Tuhan kepada takdir Tuhan.”

Perkara yang salah itu tidak sepatutnya dibiarkan berkekalan dalam kedudukannya yang salah itu. Tetapi



*Sebahagian daripada pelajar-pelajar al-Madrasah al-Irshadiah Batu 26 Bagan Dato<sup>1</sup> Perak, bergambar ramai kerana mengucapkan selamat belayar dan berpisah kepada al-Ustaz Yusuf Saleh yang akan melanjutkan pelajarannya ke Makkah al-Mukarramah dan telah pun selamat belayar pada 12 Mei yang lalu. Duduk dari kanan: Ustaz-ustaz Harun, Abdul Wahab, Haji Ahmad, Yusuf Saleh (yang diraikan), Haji Abdul Malik, Mahmud Abdullah dan Ahmad Yunus. Berdiri (barisan tengah) dari kanan: Hasan Hafiz, Ali Maarof, Muhammad Helmi, Ahmad Asmawi, Muhammad Isa, Siddiq Nawawi dan Mokhtar. Barisan belakang, dari kanan: Muhammad Syafie, Jaafar, Saleh Arifin, Abdul Jalil dan Muhammad Nor.*

<sup>1</sup> Merujuk kepada Bagan Datoh.

seyoga disebut, hinggakan kepercayaan (kepada takdir) yang secara salah itu pun ada juga mengandungi kekuatan dan menyebabkan kita tidak pupus dan hilang lenyap, meskipun dia (kepercayaan yang salah itu) ialah natijah kejihilan.

Sebenarnya tidak payah kita memberi penjelasan lebih daripada apa yang telah dipaparkan (selama 5 keluaran berturut-turut) tentang masalah ini, kerana tidak ada suatu umat yang terkenal tentang banyak usaha dan kerja-kerja yang dilakukannya selain daripada umat Islam. Junjungan kita Nabi Muḥammad *sallā Allāh ‘alayhi wa əlīhi wa sallam* tidak pernah cuba mencapai kemenangan melalui sebab-sebab yang turun dari langit, tetapi baginda mencapai kemenangan itu dengan sebab-sebab yang berdasarkan tadbir yang diatur dengan rapinya. Kehidupan baginda kesemuanya membayangkan bahawa baginda percaya kepada diri sendiri dan kepada amal usaha pada segala perkara. Tatkala kaum Quraysh bercadang hendak membunuh baginda, baginda tidak menyerah dan tidak meminta bantuan dari langit, dan tidak juga bermohon supaya Allah ‘Azza wa Jalla menurunkan petir dan halilintar menimpa mereka sebagaimana yang dipohonkan oleh Nabi Nuh, tetapi baginda telah menjalankan tadbir, lalu mengaturkan segala urusannya dengan rapinya, kemudian baginda keluar berjihad untuk mencapai kemenangan di suatu tempat yang lain – di Madinah al-Munawwarah.

Demikianlah kehidupan Islam keseluruhan, dari masa terbuka pintu perjuangan (jihad), sehingga umat Islam menjadi lemah dan berpecah belah, mereka tidak menumpukan harapan mereka kepada langit semata-mata bahkan mereka bertumpu kepada usaha dan amal perbuatan.

Tentang ini pernah diriwayatkan daripada Imam Ahmad ibn Hanbal, *raḍiyya Allāhu ‘anh*, yang terkenal bersifat zuhud dan

takwa. Ia telah ditanya dari hal dua orang ketua pemerintahan, yang seorang fasik tetapi kuat, dan yang seorang lagi lemah tetapi bersifat takwa. “Bersama-sama siapakah di antara keduanya kita keluar berjihad?”

Imam Alḥmad menjawab: Berjuanglah bersama-sama dengan pemimpin yang kuat dan fasik, kerana perbuatan fasiknya



**Gambar kenangan selamat berpisah kepada saudara Muhammad**

**Syariff Abdul Wahab pelajar Madrasah al-Khairiyah**

**Kupang, Baling, yang melanjutkan pelajarannya di Kolej Islam**

**Klang (duduk tengah), yang juga menjadi johan syarahan**

**untuk merebut Piala Menteri Besar Kedah. Di kanannya**

**saudara Yahya Haji Isa guru penolong Madrasah**

**tersebut, dan di kirinya saudara Abdul Hamid Ahmad**

**al-Ra’is al-‘Ām bagi Madrasah ini. Manakala yang berdiri**

**pula, dari kanan: saudara Muhammad Daud Ahmad, johan**

**bacaan Qur'an dalam peraduan tersebut, dan saudara**

**Muhammad Saman Haji Mahran.**

(makṣiatnya) tertanggung di atas dirinya sendiri, dan kekuatannya berguna kepada umat Islam. Adapun pemimpin yang lemah dan bersifat takwa, maka takwanya itu berguna untuk dirinya sendiri, sedang kelelahannya merugikan umat Islam.

Patut juga kita menjelaskan beberapa perkara yang samar dan mengelirukan dalam soal percaya kepada takdir ini

Allah ‘Azza wa Jalla telah memerintahkan kita supaya bertawakkal atau berserah kepada-Nya, dan diperintahkan-Nya juga supaya kita beriman dengan *qadā’* dan *qadr* (percaya kepada takdir – bahkan telah menjadi rukun iman yang keenam – P.). Firman-Nya: *Wa tawakkal ‘alā Allāh*. Ertinya: “Dan berserahlah engkau kepada Allah.”

Diperintahkan-Nya kita – sebagaimana yang diterangkan oleh firman-Nya – supaya seseorang Mukmin itu berkata:

*Wa ufawwiḍu amrī ilā Allāhi inna Allāha bašīrun bi al-‘ibād.*

Ertinya: “Dan aku serahkan urusanku kepada Allah, sesungguhnya Allah amat melihat (mengetahui) akan sekalian hamba-Nya.”

Diterangkan juga kepada kita bahawa tiap-tiap sesuatu itu adalah dengan sukatannya yang tertentu, dan serentak dengan itu diperintahkan-Nya kita supaya kita beramal (berusaha untuk dunia dan untuk akhirat – P).

Akhirnya suka saya menjelaskan empat perkara seperti berikut :

Pertama: Adalah menjadi wajib selama-lamanya supaya kita mengajak diri kita kepada berusaha. Saya percaya bahawa umat Islam hari ini telah mula menuju ke arah perusahaan. Mudah-mudahan dalam masa mereka berusaha, Tuhan akan mengekalkan kepercayaan mereka kepada takdir

dan mereka pula akan berserah bulat kepada Allah. Kalaualah saya disuruh pilih di antara sikap mereka tidak percaya kepada takdir atau mereka tidak berusaha, nescaya saya akan memilih sikap mereka percayakan takdir Tuhan, kerana saya percaya bahawa sikap beriman yang disertai kecuaian daripada berusaha, lebih baik daripada sikap tidak percayakan Tuhan yang disertai oleh amal usaha.

Kedua: Seyogialah kita mengetahui bahawa orang-orang Eropah dan orang-orang yang sehaluan dengan mereka, tujuan mereka menyalahkan kepercayaan kepada takdir, bukanlah kerana niat baik mereka kepada umat Islam, kerana iktikad kepada takdir Tuhan itulah yang telah menyebabkan umat Islam berkekalan hidup dan kembang biak serta layak pula untuk bekerja dan berusaha. Orang-orang Eropah berasa pelik kerana segala usaha mereka untuk melenyapkan umat Islam tidak berjaya, malah sebaliknya umat Islam bertambah kembang dan besar jumlahnya.

Yang ketiga: Beriman kepada takdir Tuhan menjadikan. orang Islam itu bersifat sabar dan tahan menderita berbagai kesukaran hidup. Bukti kita lihat walau bagaimana susahnya seseorang Muslim (dalam soal penghidupan) tetapi jarang yang kedapatan membunuh diri, sedang perbuatan yang demikian kedapatan berlaku dengan banyaknya dalam kalangan orang yang bukan Islam. Kalau ada didapati orang Islam yang telah membunuh diri maka orang itu ialah dari golongan orang yang telah terpengaruh kepada fahaman orang yang bukan Islam.

Yang keempat: Wajib atas kita dari sekarang bersedia dengan segala kekuatan kita untuk menghadapi musuh kita, sebagaimana yang dinyatakan oleh Allah ‘Azza wa Jalla

dengan firman-Nya:

*Wa a'iddū lahum mā istaṭa 'tum min quwwatin wa min ribāṭi  
al-khayl.*

Ertinya: "Dan sediakanlah untuk mereka (musuh) seberapa yang kamu sanggup, iaitu dengan kekuatan dan askar yang lengkap sedia."

**Demikian juga salah satu cara dari persediaan untuk melawan mereka, ialah memerangi faham-faham mereka yang bertujuan hendak merosakkan kepercayaan kita.**

Demikian penjelasan Faḍīlat al-Ustādh Muhammad Aba Zahrah Mesir, sebagai penutup.

### Kesimpulannya

Menurut penjelasan-penjelasan yang telah diberikan oleh alim ulama yang mengambil bahagian dalam menangkis tuduhan

orang-orang Barat mengenai soal berserah kepada takdir Tuhan

– sebagaimana yang telah disiarkan sepanjang lima siaran berturut-turut – maka kesimpulannya seperti berikut:

Bahawa kepercayaan kepada "qadā' dan qadr" (takdir Tuhan) itu ialah kepercayaan yang baik selama-lamanya, dan bahawa kepercayaan itu dalam segala bentuknya (hatta yang difahamkan secara salah sekali pun) telah mewujudkan jiwa yang hidup kepada umat Islam, dan kesabaran dalam menempuh kesukaran, serta bertahan dengan berani dalam pertentangan melawan musuh Islam. Iktikad kepada "takdir Tuhan" itu, pada hakikatnya yang berupa syarak, tidak menghalangi daripada menjalankan usaha ikhtiar, bahkan menggalakkannya. Oleh itu, wajiblah umat Islam dalam masa menjalankan usaha ikhtiar supaya jangan lupa pula daripada berserah kepada Allah *Rabb al-'Ālamīn*.



*Sebahagian dari pelajar-pelajar Madrasah al-Ihya' Gunung Semanggol, Perak bergambar ramai dengan guru-guru mereka. Di tengah-tengah ialah Ustaz Abu Bakar al-Baqir, mudir madrasah itu.*